

味經山館詩鈔

自題

弱齡耽詠不諳醜美少長從朱張兩先生遊得窺正迪
香未染袁趙蔣張餘習刻意孤尋輟廢餐寢每好樵漢
魏陶公摩詰襄陽太白明七子之言歲己亥夏都所作
梓爲初集出示同人多加詫賞馬蒙臬比驚其羣匹自
以爲眞虎也庚子春遊植之方先生門得讀昭昧詹言
一書始知曩作客氣陳言浮淺輕易於古人意緒歸宿
神脈氣味千萬分而未有一焉銳意改轍爲之一年先
生見謂平頓蹇塞反不及前刻之精采華妙迷所適從
者又一年日反復昭昧詹言證求古大家精深之詣久

之有獲試筆爲之先生曰可然後胸有準的望古人而力追之才薄氣弱聞以人事未克專精十年來所得僅此而已自諱其閒可存者不能百首而師友刪汰頗寬聊依諸家選存二百有九篇彙爲味經山館詩鈔以就正海內精能之士云

同志評閱意見各殊得失深淺亦異然指疵摘罅皆益我也鐘甫文君知我最深愛予詩最甚所論亦最合由結契早又守一師見聞同也他友所論切中予弊與深得余心者各錄數言於左

植之先生曰二集詩增進甚至邇來名家希此境界惟

尙未能博大沈雄充足於中自然流出用功久當自知之

又曰詩令人一見便驚嘆稱快稱奇詩之佳者而非詩之至也平心吟詠意遠韻深味長氣厚乃爲可貴杜公詩不熟讀精思其命意製局遣詞鍊字之妙不易窺也生詩佳者已有此境界然奇快之作尙多今姑存之不必刪也

光栗園方伯曰二集果大進前此未免有見好於時之意今則消融殆盡矣噫非消磨此意淨盡又烏能見好於千百世哉

文鍾甫文學曰詩小道也然必下切實功夫神明於古
人操縱卽離起伏迎距推陳出新化腐爲奇之法又深
知古人艱難迷悶奧折幽峭沈鬱飛動之致然後能隨
其才力大小以成學不流爲俗詩僞詩空詩大抵精深
華妙之境五古則謝杜韓爲大宗七古則杜韓黃蘇爲
大宗律則專推杜公黃陸佳者亦多自杜出學者由此
用功步步著實務求古人精神意脈得其歸宿然後縱
其才力所至以成一家之言漢魏陶公太白亦卓然大
宗不朽天壤第學之似易能而實難得故不免失之客
氣假象庚子以前余與存莊均未窺及此悒近乃知之

鄙才譏薄奔走飢寒望之而弗能至存莊已銳入之矣
然亦惟壬寅以後詩乃大變集中所載己亥秋後庚子
辛丑諸作半由近改原本可存者蓋寥寥矣

孫芝房編修曰求古人之意於屈折空曲之中百節疏
通生氣遠出

喬鶴儕工部曰七律沈鬱頓挫仍復一氣旋轉真得少
陵神髓餘作亦清高深遠

江貽之文學曰集中七律有似黃陸之作非學黃陸也
乃學杜公而所造適止此耳取法乎止僅得乎中淺人
不知有杜公又安能真似黃陸哉

方存之文學告予曰兄近詩言中有物意味亦深曲纏綿足令讀者感發第必根心而生將來發之事業者能實其言乃爲言立不然猶僞詩也存之不爲詩所論得詩之本斯言也終身佩之矣

馬命之文學告予曰兄性剛直遇事發之太過少含蓄渾厚氣象惟律詩則已能柔其氣而漸幾於含蓄渾厚蓋由揣摩杜公久用力者深變化氣息故也學問之事無用力而不變願兄以學詩者更移而養氣務使真氣充滿客氣淨除將來發之事業傳之文章者無窮文藝末也德器本也兄於其末既求所以變化之矣於其本

而可不思所以變化之哉存之命之皆予輔仁友也卽
詩以勵我者如此述之以當書紳

與觀羣怨詩之教也聖人刪詩存鄭衛乃以垂戒萬世
非謂詩之中宜有此一類也屈子美人皆寓言漢魏詩
人類同此意迨六朝而後有專爲男女之詞者自唐迄
今騷客詞人多不以此爲嫌輕薄狂生行身無檢且有
謂不如此不足爲詩人者嗚呼詩教之流毒天下乃如
是邪少不知道初學作詩見時輩負詩名者集中類有
冶詞豔曲以爲詩之體必宜有此揣摩做法不一而足
擔麻弃金認賊爲子吁可悲也詩教之壞此特其末耳

而舉世已迷溺而不知况其大邪歷觀古今詩話論詩之悵備矣求其得詩教之本深合聖人與觀羣怨之悵又於古大家精深微妙之境發揮透闢宣暢無遺則莫過於吾師所箸昭昧詹言一書近見山陽潘君四農養一齋詩話與吾師大悵相同明道義培風化正人心卓然有裨於名教雖其貶斥阮籍謝靈運陳子昂諸人至欲廢棄其詩不免矯枉過正要此論不可不存於天壤間也因編詩特表出之以告海內有志風雅正道者道光三十年庚戌嘉平十日鈞衡漫識

味經山館詩鈔目錄

卷一

己亥秋後五首

庚子十首

辛丑十七首 刻後刪五首

卷二

壬寅十七首

癸卯三十首

卷三

甲辰二十三首

卷四

乙巳二十六首

卷五

丙午九首

戊申六首

己酉十九首

卷六

庚戌四十七首

味經山館詩鈔卷一

桐城戴鈞衡箸

門人王祐蕃校槧

己亥秋後五首

應試金陵舟中寄鐘甫

一水明殘照千帆下秣陵秋聲盤野闊天影入江澄挾
策人爭上懷痾汝未能匣中看劍氣深夜定飛騰

舟泊牛屯河大風雨

朔風鳴大江驟雨滾飛浪有如千丈坡萬馬突奔放到
岸山欲崩觸磯勢益壯旣疑地翻轉復駭天簸颺委哉
纜早維履險得無恙蒲帆倘不收一葉知安向老親念

明倫彙編 家範典 卷一百一十五
遊了悵然魂欲喪

答友人見寄

天末遙山一髮青
小窗孤對雨冥冥
人非中酒心偏醉
我獨沈憂眾覺醒
俯仰古今唯涕泣
艱難時命任飄零
推琴嘆惜鍾期死
流水高山世莫聽

紀災二首

彌天風雪路漫漫
滿眼瘡痍未忍看
黃口命輕拋擲易
紅顏恩重別離難
覆巢雖燕身無主
覓食啼烏夢不安
痛欲捐生艱一死
可憐衰病向飢寒

思歸無處覓田廬
忍弃頭顱蔓草餘
殘歲可能春易轉

此生難卜命何如窮途不盡傷心事大府頻頒議賑書
升斗西江宜早計莫從荒市索枯魚

庚子十首

呈方植之先生四十四韻

聖人歿東魯二氏誕恣放子輿閑先王朱翟不敢抗方
策遭秦火聖文痛凋喪炎劉膺天祿百家勤搜訪肆令
曲突中死灰風復煬晉唐代英哲說經多簡諒所稽吾
道精循牆走依傍有宋文運開昭然天地曠江漢滌埃
坳日月消烟瘴至理久瘞薶一朝發幽壙往彥關康衢
來賢獲正匠那知六百年羣兒肆誹謗折鼎弃膏梁倒

甕飲醯醬牧童拾斷鏃挽弓射飛將騰蹕藩籬外自矜
工鹵掠豈乏一管窺足符千載上八主出則奴幽怪多

冗長

韓句

夫子當代賢慨焉期掃盪不憚孤掌鳴力爲百

川障鉤元鹽其腦窮源破厥臟好辯非得已聊欲示懲
創遙遙百世心上與子輿况餘事力文章萬卷紛來貺

義湛思迺潭中弼外則益遠蹈韓曾軌近作方姚伉

謂望

溪惜抱
兩先生

下視庸鉅子呱呱小兒哢詩律何精嚴絕徑乃

孤向艱奧謝韓并沈雄坡谷讓出新微舊蓄食古化今
邈盤夫昧塵躅警醜毋乃妄嗟哉大雅希乾坤闕無望
風塵迫衰老萍梗縱播漾星星兩鬢霜汎汎萬里浪昨

者客海南來歸月已暢春風蘇百昌嬌羽弄羣吭偶登
元禮車遂測叔度量坐對驚汗浹私願覺身妨鴻儒倘
弗覲此生幾虛蕩餒腹來官庖羞糞入寶藏既承鄉哲
許先生謂鈞衡詩文似海峯先生復茲俗華尙務實缶有孚逐虛管無
當弱齡嗜狂吠陰喝弗敢唱歌詩仰見高占易往用壯
吁嗟大道邃徘徊我心悵

雨過

雨過爐香手自焚槐陰竹色一牕分
呼童掃榻鉤簾起
坐看青山吐白雲

宿山家早起

向曉羣雞鳴樵歌滿山路朝陽散微明遠水吐輕霧草
根寒逗泉松杪清滴露麇鹿時復來飛鴻聞自去坐久
林樹昏雲生不知處

母大人六十壽辰

膝下瞻依慣渾忘白髮垂早衰緣境累多病畏兒知冀
得天心佑常驚日影移殷勤將壽酒願及百年時
萬事皆身外親年無再來古人勤負米今我愧循陔捧
檄艱時命嘗羹但野菜負恩無限感懷抱向誰開

丙子三十初度

伊汝日來歸八載旋於茲房帷乏侍婢箕箒親操搗餼

豈母少休作苦良已疲侍養櫛繼勤承歡影響隨我少
耽翫愒帛長嗟已遲落實慚西疇虛名誦南箕平生父
母恩飲恨難陳詞借汝婦道修償我子職虧來辰烏相
逐逝景驄莫追前朝黑髮親今見白絲垂勸爾班昭篇
誦我南陔詩

金陵送別毛丈生甫

萬木動秋聲嗟與君子別相見遽相送離情那可說憶
昔詠輞飢遙遙望空缺今歌不我弃賑賑心相悅山風
灑寒雨江濤滾飛雪白門舟共鼎旅館尊同設來醉日
無虛過存禮有缺吾師植之翁與君傷闊絕昨傳尺素

來萬語情未竭復書誣我將殷勤道哽噎茫茫四海內
落落幾人傑師門快昔遊耆碩復今謁後造盼遠程前
非迪改轍充實乃光美芬華易消歇真傳遞薪火高懷
證江月江月忽無情照君征帆撇後會知何時徘徊對
城闕

舟上馱山磯

危磯若張弓江流如使箭風停眾卸雙岸遠爭負牽懸
崖類斧削巖蹊莽荆罅千臂魚貫引萬足雁行薦峭壁
伊誰繫長菱傍水穿旣賴百丈挽復此千尺援搯搥蘭
生掌邪許汗浹面昔我揚帆過頻年得風便今來覺惶

恐色然爲駭變萬事悟進難百年那有羨瞻彼刺舟郎
足起我心倦

秋晚懷都門諸友

日落前峯陰林昏歸鳥劇莽鴟散深朱寒塘漾淺碧晚
雞下檐樹落葉響階石長風送別意明月共今夕燕冀
多悲風天低沙氣積相去邈萬里相思若咫尺思之終
不見何如不相憶

九日約小石遊龍眠以雨不果

紅樹蕭蕭萬壑秋萸囊菊酒擬同遊青山咫尺不能到
坐看溼雲飛滿樓

辛丑十七首

題陳照所畫江景爲許丈吾田賦

江風忽起雲飛揚雲飛直與江流長遙空萬頃日無色
但見遠水浮蒼茫蒼茫水氣昏如墨上與雲連爲一色
天低在水水涵天上下乾坤分不得是時兩岸青山無
萬樹欲倒雲爭扶賈船商舶不敢動千帆盡落依菰蒲
我昨登樓望江水此景依依在眼裏先生示我江天圖
尺幅烟雲吞萬里六安陳照舊有名酒酣潑墨何縱橫
寫山亂石欲飛起繪水江流如有聲此圖神妙尤莫及
毫端風雨來胡急想其握管坐臨池真氣蟠空鬼神泣

祇今作畫二十年墨氣淋漓紙猶溼江天莽莽樓臺昏
江水滔滔波浪立請君慎勿藏匣中恐有蛟龍時出入

旅館

旅館聞鄰哭從軍向海疆幾年食

帝德萬里促戎裝死國尋常事生離漫自傷將軍能破
釜甘爲作羣羊

聞警

仁皇英武縱由天尺檄緩疆萬里傳四海冠裳周禮樂
八方風雨漢山川梯航効順連諸島絲帛通洋已百年

蛇豕近傳侵

上國安危爭賴將臣賢

道中書所見

雨止驅征途行行苦泥轍驚見眾肩輿辟易屢蹉跌借
問輿中誰太守婢與妾太守來鳳陽遷官未盈月前旦
夫人過昨晨郎君發遙念黃堂中粉黛成行列方今大
海南兵船環雉堞將軍甫遠征羽書未獻捷黎苗各奔
竄骨月生斷絕太守海南人室家自歡悅傷哉故鄉里
流離那可說

屬車

屬車雲合起飛埃節鉞森巖壁壘開玉帳擁尊歸壑谷

珠牀挾瑟縱輿臺千村望歲呼庚至萬卒趨風奔甲來
靴挾短刀唐代將感時深冀出羣才

鐘甫書來報王殿襄死矣

得書一慟轉疑猜前日禪房共舉杯從此山陰風雪裏
更誰乘興泛舟來

寄李幼甫

大江從西來洪濤蕩朝夕揚帆我東下千里快一息是
時秋已深寒雨洗空碧踏泥訪故友毛公先在席謂寶
甫飛觥迭酬酢相對情脈脈但覺春生座焉知日下
壁別來忽一霜日月嗟易擲雲樹五百里此心猶咫尺

唐詩集卷之二
一
奮袂欲東從，啼無雙飛翮。毛公今何方，魚書不可覓。煩君爲問訊，鬢邊幾絲白。

書感

連朝風雪滿江城，忍聽哀鴻四野鳴。大府有權籌國用，中丞不發帑金論各州縣勸捐接濟。小儒無術濟民生，况聞中土河流決。更說南邦海寇橫。

盛世兵荒原不免，撫綏安堵賴諸卿。

橫海

橫海鯨鯢跋浪來，黃金賺價蠹誰開。豈無新息平蠻策，竟使相如受賂回。帥節屢更鋒鏑，敝軍威不振。鼓聲哀。

金貂十輩何須問太息人閒宰相才

孤臣

黃塵白草暮雲愁華髮孤臣萬里遊底事呼天哀九死
但期安漢有諸劉雄心消盡寒邊角老骨難禁絕塞秋
天意不教生馬角桑榆西望更誰收

輓詩

憂天憔悴願難據尸諫爭傳衛史魚一死千秋存亮節
孤忠萬語托遺書馬卿有札人誰奏李嶠無兒事已虛
太息琅琊堂構瘁老臣原下恨何如

所思

口
卷一
空山十月雲欲霜木葉飛盡枝條長病臥寒林月來去
夢回孤榻天蒼涼微颺蕭蕭響枯竹野鼠歷歷奔高牆
所思不遠未能見出戶羣鴉啼夕陽

味經山館詩鈔卷二

桐城戴鈞衡著

門人王祐蕃校

壬寅十七首

元旦作

邊地愁烽火中原秀太平

至尊憂百粵諸將尙南征黃屋誰扶軫清流漫議兵匡
居感新歲搔首亦心驚

白髮高堂上欣然坐舉杯諸昆隨侍飲羣從亦歡陪以
我庭幃樂而生道路哀流民滿中澤歲盡不歸來

得毛丈生甫凶問

昨秋致書李叔子問訊寶山生甫翁答云客遊若浮梗
經年未得天涯鴻憶我別君瞬一載意氣耿耿遙相通
雲山迢遞不可隔心隨江水流朝東空山翦燭誦君句
夜寒月落霜飛空思尋消息寄尺鯉重逢氣吐垂天虹
忽聞凶問坐驚起雙淚落影飄春風嗚呼海內幾儒碩
如君遭值何孤窮一身俯仰魏晉上四時奔走飢寒中
天之生才有必靳充其學者勞其躬文章身後但可久
生前何惜如飄蓬先生有書擬球壁精氣上可摩蒼穹
豈土一朝葬骸骨青山萬古開心胸獨我一謁不再見
私懷鬱鬱安有終秦淮客館嘯風雨豈知遂訣千秋蹤

臨風作歌當痛哭白雲隱隱迷前峯

書植之先生病榻罪言後

英夷跳梁東南大帥議撫先生時臥病切齒痛

心作書言制夷之策名曰病榻罪言遣人上之浙江軍門不能用

陳東一疏淚游浚正則千辭心亂煩破敵幾人如李愬
橫戈何日斬孫恩敢從草野籌軍事專望

朝廷采罪言近說羣公主和議空勞萬馬出中原

偶書

春風散舊寒微雲吐新旭宿雨一宵霽芳草萬里綠魚
泳識川溫鳥呼快林煥萬物有生意陶然吾心足

過亡友王殿襄宅

春來山水足可樂忽忽風飄雙淚分
去年來過南岡道
故人與話東村雲泉臺杳杳豈再面
浮世悠悠誰似君
蒼茫久立不忍去孤鶴一聲空外聞

登大觀亭

傑閣臨江四望開虛廊蕭颯走風雷
坐看山雨入城去
無數烟帆繞樹來
弔古蒼茫元季事
憂時零落巨川才
近聞夷舶乘虛至
新自金陵載寶回

焦山望海圖爲董思陶題

江水西來一萬里奔流直下海門裏
金焦水底兩卷石
突出波心過江水
江流東去不復還
兩山亙古波濤閒

江光天影欲合處乃有大海萬頃之迴環方壺圓嶠不
可見混茫一氣吞赤縣兩丸日月生波閒萬里魚龍出
酣戰昨聞夷舶兵戈橫揚帆徑抵丹陽城焦山烽火照
空赤長江千里無人行江南地勢蟠龍虎天設南徐作
門戶如何狼山與靖江險要不聞鳴戰鼓悲哉居民徙
村落骨月生摧委溝壑大府移營退石頭不尙兵戎尙
盟約嗚呼時事安可論遙瞻滄海聲潛吞君之作圖有
深感昔所快意今消魂海潮江水自朝夕爲想焦先之
遺跡撫時懷古恨蒼茫共汝長歌仰空碧

小孤山

太華萬仞何雄哉三峯削出青雲隈六鰲忽轉地軸動
一峯飛落江心來坐看帆影與空遠傳說海潮於此回
潮水至小東望建康七百里風濤直射天門開
孤山止

秋感寄蘇厚子文鐘甫江貽之方存之

不敢關時事吾儕乃布衣

九重封事少諸將昔人非赤壁輸奇策黃金解戰圍昨
聞江上吏新唱凱歌歸

霜重雁南來秋聲亦可哀遙揮東海淚虛憶北山萊歲
月催蓬鬢乾坤待相才隆中誰管樂懷古意悠哉

命薄逢時難書生感憤同百年驚世變四海惜途窮飄

泊風中絮生涯塞上鴻近來多別淚豈獨爲飛蓬

馬通守玉屏山莊落成招遊賦贈

出郭俯郊野綠溪入幽僻踵門不見廬入尋始可得開
雷喻天明引泉洞地脈西亭圓覆蓋北篁密如簣遙嵐
撲眉宇近翠生肘腋萬景匯遠近數楹抵千百太僕做
楣棟哲嗣供彌勒山莊爲明馬太僕公歸老別業其子爾恭痛母早亡追緘寫經供佛於此
瞬今二百年松楸護兆宅堂堂歲月遷莽莽人事革華
屋多荒坵名園半草澤獨此巋然存新宇復今闕耳目
俟昭煥山川恍更易苟非忠孝遺盛替那可測眾賓悅
勝覽吾意重先德守此貽孫曾永之年萬億

送人還鎮江

丹陽兵火驚初定，城郭猶存市井非。
千里飄零仍遠客，一身歸去恐無依。
已知死別成長憶，縱有生全亦苦饑。
嗚咽江聲下京口，潸然東望爲沾衣。

城東客舍重陽日追悼王殿襄

城頭草樹與天長，城下烟光接水光。
對酒看花忽下淚，故人曾此醉重陽。

得張亨父開封書

張衡已入陳，留道尙想河梁祖。
帳開漠漠白雲人，北去蕭蕭紅樹雁。
南來發書驚喜翻，垂淚冀我飛騰愧不才。

三十飄搖無一事况逢時難甲兵催

冬日得劉悌堂手書卻寄

西山雪色照幽燕萬里鄉心白髮前念我病中猶數字
懷君江上忽三年東南兵甲新棄戢老大風塵縱醉眠
近說文名動卿相悲歌彈鋏漫淒然

癸卯三十首

夢遊九華山

依然繞屋柳氍氍孤館春燈酒半酣忽憶九華山色好
輕帆一剪到江南

讀史

揚璇何事檻車收嚴詔驚聞涕劇流南海萬民思借寇
中原多士失依劉機槍未應旌旄落日月方深犬馬憂
但得鬼方從此靜歸田出塞總優游

障海勳高轉罪臨蛾眉遭妒古猶今漢廷胡廣誣滕撫
魯國臧孫蔽展禽未敢曉曉傷國體惟將蹇蹇勵臣心
天王明聖終憐過草野能無望闕吟

江村

萬柳綠成海花飛雪滿汀雨過江氣白山小日邊青
鷺依人熟魚蝦出水腥何當謝車馬簞笠共揚舲

借信吾斗垣看花憶吾田梯堂都下

今年花似去年春一見花開一歲新莫向故園嘆花落
天涯愁殺看花人

寄張叻園先生

海內詩人盡江干獨老翁衰遲逢世難荒歉逼途窮感
舊交遊少憂時義憤同草茅休涕淚謀國有羣公

得方海船延慶州書

驪駒一曲別江頭我困家園汝冀州薄海新交誰似舊
朔方春氣半如秋黃塵慘淡邊風緊白草荒寒塞月愁
萬里居庸關外雁爲傳消息到山樓

送別劉孝廉

春江初見柳絲繁才解歸裝又北征萬里長驅雙鬢短
十年多難寸心驚新消粵海兵戈氣永絕淮山草木聲
一事臨岐尙惆悵南天遙望失長城

送江貽之赴河南

故國無容地飢驅入大梁艱難初遠客窮病易思鄉月
照心千里雲迷樹幾行鹽車多涕淚何處是孫陽
幕府才原拙文章命不如尙存吾道重恐與世情疎萍
水恆憂汝雲山倘憶余南來有飛雁莫忘數行書

病中讀杜詩

弱齡弄翰嗜蟲吟絕學微茫苦未尋此日病中強推測

艱難初見古人心

柬黃安張學博

我家桐國汝黃安
明月青天兩地看
千里音書傳每隔
十年時事變無端
艱難歲月消吟鬢
漂泊乾坤有釣竿
他日相逢應老大
莫教白首悔儒冠

寄殷子徵潁州

入春苦稀雨
陂塘盡已竭
麥熟黃未飽
秧齊綠欲歇
南風昨夜來
吹雨出林樾
檐響一時猛
泉聲萬壑發
晨起顧田野
汪汪千頃雪
卽今稚苗分
豫想秋穎結
吾鄉屢災歉
殍亡那可說
知子廬田圓
望歲心如咽
試買雙鯉

魚寄詩慰離別

金陵月夜登江樓有感

四圍烟樹影迷離高閣良宵對酒宜雲散忽看天似鏡
江清初見月如規山河六代消雄氣砧杵千家動客思
別有傷心無限感去年烽火正今時

訪包慎伯明府賦贈

遊倦風塵賦遂初罷官聊憮白門廬高談俯仰千秋事
下筆縱橫萬卷書海內共傳劉四罵江南今有鄭公居
秋風黃葉臺城路許我來停問字車

金陵送涇川友人歸里

秋雨洗空天蔚藍送君歸隱桃花潭他日相思不相見
我從江北望江南

畱別劉叔毅

江上西風一雁鳴更吹寒雨度孤城與君別後愁多少
試聽長干落葉聲

渡江宿浦口

渡江日已昏投市燈盡發蒼黃赴逆旅車顛人亦蹶卽
次斯已安得廬敢云腐解襪藉黃茅入門見白髮心知
征路遙如何歸期忽晨風起天半蕭蕭響林樾荒雞續
殘漏酒醒夢亦歇呼僕戒征裝驅車趁斜月

過廬州雜詠

驅車曉日又斜曛捲地城頭入暮雲萬頃田疇半禾菽
幾家男婦雜耕耘官閒雉堞看新築野闊鴻聲靜不聞
傳說使君如父母我非桑梓亦欣欣

時廬州城垣新修耕父爲殃民皆安

堵令合肥者沈君祥煦也

平沙莽莽鬱樓臺城郭蒼茫氣壯哉地近潁淮民好武
天生忠孝古多才

宋包孝肅馬忠肅元余忠宣皆廬州人

虛傳浦有筭聲

出不信山從海上來往事消沉君莫問尙書遺宅且蒿

萊

謂龔司馬

孫曹伯氣久消磨此地曾經屢用戈黯黯暮烟殘壘廢

離離秋草戰場多，巢湖水闊疑天盡。
金斗城空有雁過，欲訪荒墳弔小吏。
千秋哀怨近如何。

中原北望盡黃沙，匹馬南行未見家。
客路秋風驚落葉，城頭衰柳聚寒鴉。
病兒消息今何似，時仲兄臥病遊子鄉心

近轉加翻恨龍眠，山色遠白頭猶自夢天涯。

月下謁包孝肅祠

淺水菰蒲別一村，野人導我香花墩。
數行疎柳上新月，一片清光來廟門。
浮世悠悠誰氣節，虛堂寂寂自精魂。
漁翁把釣日來往，空問年年春漲痕。

宿廬陽口號

海月如鉤挂女牆照人今夜宿廬陽不須更作還家夢
明日青山是故鄉

過小關三國時夾石也

萬山中斷狹如門尚有前朝瓦礫存三國戰兵曾屢伏
羣舒地勢欲全吞潼關扼險軍猶入劍閣橫雲馬亦奔
自古安危仗人力區區奇隘復何論

過胡先生故宅

茅屋青山隱數椽登堂無復絳紗懸尙餘手植門前柳
零落秋風十二年

連得許丈吾田都門書兼聞鄉捷

故人一去三千里兩月重來雙鯉魚直北雲山勞望我
江南風雨渺愁予問奇每悵楊雄隔解字今誰許慎如
老大科名非異數最難開篋有傳書

哀仲兄

獨坐哀君君不知空庭烟雨雁來時平生友愛中途訣
未了因緣再世期強咽悲聲寬病母頻揮淚眼慰孤兒
卅年弟職慚多缺到此傷心悔已遲

雪夜書感

雪積空庭夜色明天寒風勁樹爭鳴銅龍細響不成寐
鐵馬沈吟無限情拊枕哭兄燈黯黯感時傷事淚盈盈

老親久客滄江上白髮蕭條日夜生

東孫竹康

秣陵明月憶同遊徑脫吳鉤上酒樓四海論交初識汝
六朝如夢又逢秋曾經烽火飄搖日共抱江湖拓落憂
小別滄江驚歲晚朔風吹雪打城頭

贈劉騎尉

彎弓射虎氣猶橫誰遣頭顱白雪盈慷慨功名悲驥老
淒涼風雨聽刀鳴吳王早日求孫武晉室先鞭詎祖生
淪落可憐終下職強除紆冗答

昇平

味經山館詩鈔卷三

桐城戴鈞衡著

門人王祐蕃校

甲辰二十三首

送前臺灣道姚丈石甫之四川同知新任

宦遊昔海外瞻近苦無以來歸慰朝饑去別驚暮晷

君恩篤再造

國事輕萬里芳草動新綠征蹄發伊始名州協濬夢峨
坂想尊軌峩峩蜀山高湛湛錦江泚炎精昔隕光葛亮
煽殘燧三分割地絡孤忠彌天紀

聖明鼎昌運遭際殊泰否同襄蹇蹇忱復孕休休美卽

今丞倅微預卜公相偉舟停土堵牆車過民附螳勳名
滿華夏此別足可喜平生二三親依依獨難已微才辱
矜寵歧途重徙倚心懷萬國憂願爲一人矢祝公黃閣
進見我蒼生救嗟哉四海闊歸然一柱砥顧往虎尾亨
惕來春冰履泥塗盼香漢道遠心孔邇嚮往不能至載
歌詩仰止

隨植之先生城東僧舍挽建甯張亨甫旅櫬

淒涼一寺莽蕭萊東海詩人櫬北回生死相依惟石友

謂姚石甫觀察亨甫卒於觀察都門寓所
觀察以其櫬回桐書告其子來桐迎櫬乾坤多難失

君才綏江萬里歸魂遠中路孤兒泣血來昔別病翁今

撫木爲吟蒿里不勝哀

前歲亨甫過柵
植之先生方病

凶問初傳慟轉疑如君雙鬢未成絲
黃河書到猶思復壬寅秋得亨甫開
封書尙未報也白馬人來已不知
落日杜鵑聲慘慘悲風楊柳影垂垂
卽今灑淚城東道尙想前年送別時

哭李春臺

豈知山市重逢日竟作泉臺永訣人
凶問昔傳曾是幻去秋人傳春臺病死旋過
訪於孔城聚談兩日別去癡心今望尙非真
絕無儲粟遺孤子定有殘魂傍老親
好友如君亦昆弟鵲鴿傷罷又沾巾

余仲兄亡甫
四閱月耳

宿舊棲旅館追悼仲兄

寒燈孤館對牀眠
江上重來憶昔年
一樹芭蕉如舊綠
小牕聽雨獨淒然

皖城懷湖北張廣文

楚雲隨漢水流入皖江
來愛爾不能見起登江上臺
莫天寒雨集畫角野風哀
欲寫相思句南飛雁未回

得家書

大布長飄泊乾坤一劍存
暗拋遊子淚深負老親恩
命薄文章賤書來語意溫
夜深頻起舞吾憶晉劉琨

哭劉岱青卽柬尊甫悌堂進士

欲乞靈巫訴帝闈
彭顏修短事難論
少年如子豈多得

斯道幾人相與存兩載嗚嗚恆泣母俗青母憂未除一身踽踽
更無昆二千里外驚聞訃腸斷家園骨肉恩

題許叔平天風海水圖

虛堂一夕橫烟瘴怪哉滿壁生波浪蛟龍騰躍起戶牖
鯨蜃低昂出紙上枯槎兀坐者誰子置身去天不盈咫
笑呼海若作前導更遣冰夷供後使我聞海客尋斗牛
無心乃作銀河遊又聞成連工奏曲孤帆一葉橫滄州
圖中之人疑其儔不然宗慤乘風萬里浪左思濯足滄
江流人生懷抱各自許今人何必追前古濠梁魚樂達
士嘆沂水春風聖人與男兒寄生天地中那能握甌依

萬蓬登高須覽日觀日涉水當乘瀛海風瀛海一氣連
鴻濛星辰在水波浮空塵飛鳥翥不得到乃可開拓萬
古之心胸吁嗟乎江淮河沛稱四瀆牽舟往往駭心目
庸兒日事溪沼遊那識尾閭容百谷如君意氣橫乾坤
尺幅照耀扶桑瞰誰與潑墨爲寫此慘淡白日驚黃昏
前年海上妖氛橫

聖德懷柔新底定爲汝題圖頌家國碧海青天萬里淨
過牛清感魏朗事

赤九際衰運黨禍開周房君俊顧及尉死徒道相望少
英負盛名亮直中官妨一朝被逮急仰天自絕吭人生

皆有死男兒氣獨揚大江流悲聲千載猶湯湯太眞鼎
彥伯遺事安足詳云何過牛渚不數漢議郎作詩表幽
微淚價如掛漿

贈馬雲

通衢冠蓋日紛紜誰向城南問馬雲我亦江東憔悴客
秋風淮水獨逢君

十年賣畫隱江關拓落風塵鬢欲班但使得錢供一醉
閉門閒對六朝山

七月廿六日孫竹垞招集江南北詩人飲集五松
園席上作歌用杜公蘇端薛復筵簡薛華醉歌

韻

風塵幾載白門道吾儕會合胡不早西風送雨涼意足
鶉鴉條已鳴秋草詩人大江隔南北有若浮雲散晴昊
園林一旦萃羣賓江河萬古開遠抱縱談所及忽不樂
未敢狂言但心擣諸君努力事遠大毋使朱顏坐凋槁
雕蟲篆刻小兒事兀兀窮檐嗟易老孫公罷官昔歸來
海內共識園亭好花木豈因時代革公子才華太潦倒
謂竹 當筵且盡新知歡向後升沈那自保酒酣擊劍歌
聲來狂鯨吸海無餘杯良辰勝會不快意天生我輩何
爲哉秋心萬里正清發鵬鷲定不栖蒼苔且共痛飲休

銜哀

秦淮曲

垂柳垂楊拂畫楹
幾家亭閣夜吹笙
行人莫聽秦淮曲
送盡南朝是此聲

旅病

旅次戚無悰
復此兼辰病
腹張氣欲絕
藏虛熱乃凝
庸醫誤攻伐
元氣剝欲罄
三日絕漿入
一念耿灰燼
心知匪暮期
亦恐斷朝命
同里二三友
歸帆先後迸
嗟余困江郭
殘生僅若賸
老親得消息
魂夢那能定
人世固如寄
奄忽造物聽
我生非弃材
一豎豈遽橫
稱藥來眞長

量水得荀令望色僕暗祝聞痊友私慶起視江月明落
葉填行徑

臥病連朝程信吾夜起爲求醫藥江甯秦雪舫陽
湖孫竹康寶山蔣劍人滁州馬晴齋涇川翟柳
村全椒吳次山烏同里諸子先後來問疾者數
十人小愈作此謝之

江上支離病骨輕故人情重爲心驚蒼黃中夜求醫藥
生死他鄉仗友生曉夢暫歸家尙遠鄉書欲寄雁無聲
諸君愛我晨昏至始信天涯有弟兄

江邊觀漁舟遇風作歌

一舟忽墮波心裏後波復湧前波起舟從波底忽飛出
勢欲拍天天在水人立舟中隨播蕩孤蓬焉敢與風抗
烟中一葉兩葉帆天邊萬里千里浪中流老子坐自得
觀者兩岸色沮喪人生忠信雖可持輕身涉險非所宜
我呼漁翁笑不答長江那畏風蕭颯君不見前日濤頭
百丈高我駕小艇如輕毛垂鉤釣得尺半鯉月明煮酒
歌陶陶

八月二十七夜舟中夢先仲兄

去年此日初歸里問病牀頭淚滿腮今歲孤舟仍客裏
大江殘月夢君來談深尙覺生存樂寤後方知死別哀

坐起推蓬一揮淚可能消息到蓬萊

哭張氏妹

中年寡歡事哀痛生骨月仲兄偕叔妹相繼登鬼錄傷
哉未亡人晨昏祝死速夜雨血淚枯朝霜年命促我征
赴白門相送依依哭謂兄歸苟遲恐妹逝已倏豈知握
手言頓成絕命曲悠悠泉臺路長夜無朝旭汝去乘烟
霧汝來倚修竹仲兄樞婢野傷心秋草綠老親涕甫閣
爲汝復連漉泉下倘相遊爲畛魂來復

書感

慷慨中宵一劍鳴蹉跎壯歲百無成恥爲摩詰援公主

那得於陵訟李程萬里未消心遠大百年難鬱氣縱橫
亦知得失尋常事其柰高堂白髮盈

寄姚丈石甫四川

我倚龍眠百尺峯離情遙寄錦城松別來南國懷司馬
此去西川起臥龍

帝恩再生非貶黜臣心九死尙從容朱昂莫鄙咸安令
時聞初補順慶府之蓬州益策忠勤報

九重

送人之甘肅依其族人幕中

饑寒歷盡此身輕幕府邀憐事遠征痛訣妻兒成永死

拌從萍水句餘生長途萬里風塵色絕塞中宵鼓角聲
他日倘歸能健否只愁霜鬢苦縱橫

淞江諸生書陳忠愍殉節事徵詩海內刊而行之

曰褒忠錄讀之感賦

江左金貂未忍論將軍泉下亦聲吞不因死後和戎易
那識生前將令尊萬里妖氛潛海寓諸生義憤表忠魂
中興全賴羣臣力豈獨陳公拜

主恩

味經山館詩鈔卷四

桐城戴鈞衡箸

門人王祐蕃校彙

乙巳二十六首

雪後馬氏園中看梅花賦寄曉媚丈皖城

故人江上去憶否梅花開獨我此清賞山城雪後來暗
香浮竹樹寒影動樓臺不敢折相寄恐令歸思催

輓張勛園先生

天遺一老滄江上破屋荒村臥綠苔涕泣悲歌天下事
縱橫驅遣古人才青尊風雨三年隔白髮飢寒百事哀
正乞北鴻傳信去不堪南望訃音來

爲客

爲客在鄉里而亦多離愁念我華髮親復此同氣儔初
睽夢屢勞逾時寢卽休離別豈異情習慣不解憂黃塵
困征馬白浪催行舟誰非呱呱兒長大辭林邱歸來拜
新壘泣血空椎牛大哉宣聖言親在不遠遊

聞厚子臥病杭州卻寄

杭城是昔曾遊地亂後重經事異前念遠爲尋南去雁
思鄉應夢北來船窮途欲死偏多病孤館無親且自憐
留取此身重吾黨古來陳蔡有諸賢

柬鐘甫爲報姚刺史消息

楊柳易春色山城二月稀石泉經雨活海燕掠雲歸不
惜別情苦所傷吾道非西川聞遣謫長望淚沾衣

暮春

和風扇高宇淑氣蒸平田巖壑發清媚雲日相輝鮮萋
萋舊草榮灼灼新花妍圍柳冑萬絲梁羽棲雙元遠覺
烟際山近聆風中泉莊樂不在魚孔嘆甯爲川風浴懷
魯狂觴咏思晉賢爲補舞雩吟載諷蘭亭篇

病中書感

萬里滄溟一葉舟我思乘興泛中流風雲會合原難問
烟水浮沈且自由敢易初心營世習惟將多病體親憂

春光又滿江南綠長恐悠悠到白頭

借貽之同甫登翠竹碧梧山館復同步西城偶話

黃竇二公明季全桐事

久羈深宇中忽立高亭上人烟吐萬竈城郭小一盜孤
雲來復已飛花去轉向竹陰動人影天風答鳥唱殘紅
飽近翫新綠媚遠望移步入闌闌拾級出空曠羣山青
送黛細麥碧交浪觀高飛羽礙徑仄遊女讓海疆兵已
消山國患猶防頽垣萬堞新孱氣一朝旺昔在秦寇烈
中原郭郭喪獨此保無毀豈伊固足抗晚風送鐘鼓慨
然思昔將

寄劉悌堂明府廣西

十月落黃葉孤舟饑故人相思廣西道已及江南春慟
子猶含淚思親更愴神莫徒傷骨月在職有斯民

江石三出其先大參公所書迎

盤頌索題作此書之

先人曩盍簪

先高祖柳溪先生與大參公爲舊好

今汝復我交出示迎

鑿篇展冊騰螭蛟

仁皇昔南巡翠羽彌慶霄懷柔靖川嶽玉帛賡虞姚澤
下澍滋尺吹萬風來條江公致政歸乃趨

行在朝頌唐儀康衢規穆殊祈招清思若湧泉萬里來

滔滔忽今二百霜手墨光猶饒感子清芬頌傷我先澤

遙舊序簾猶儲殘帙烟已消

先高祖蟬吟集江公會爲作序今序存而詩不可得

矣余生復苦晚初盛不可遭念先既潛潛感世亦搖搖
所幸意氣同新漆續舊膠勛哉明德崇母貽隊緒嘲

四月一日歸家三姪煦出文請校作此示之

萬里春殘昨夜風四山吹散雨濛濛暫歸愈覺田園好
薄飲歡呼骨月同窮賤半生吾未免文章一事汝初通
無端執筆生狂喜轉覺傷心痛若翁

左耆孫都門歸里過訪次日卽歸皖城

二千里外初歸客好友驚逢喜欲呼對酒莫傷青鬢短

還鄉聊遣白頭娛，漫愁離別明朝意。善保風塵病後軀，
與子更爲江上約。黃花紫蟹就提壺。

人有謾言耆孫死者，喧傳十數日。得手書知病小，
愈矣痛定賦此。

亦知傳死人言，幻未免驚傷。淚滿襟，江上尺書旋報我。
市兒飛語，竟何心病。軀護憎從加意，塵劫消殘喜。自今
他日相逢疑隔世，夢魂猶爲苦低吟。

喜董思陶都門歸里，因悼亡友劉芾之。

滿眼風沙出。

帝闕三年離恨，此開顏共談往事。傷時改且出新詩對。

酒刪苔草綠侵城上樹槐花黃落雨中山今朝歡聚悲
前別獨有劉郎去不還

偕方魯生孫礪泉文鐘甫江貽之方存之何眉岡
馬命之讌集城西張太守宜園卽送礪泉之湖

北

斷蓬飛絮渾難定此日同過太守園吾輩飄零仍故園
古人談笑靖中原諠譁且盡雲邊日風雨欲來城外村
秋水挂帆君獨去漢陽烟樹黯消魂

秋夜

風雨催黃葉秋聲滿客心思歸偏夜永多恨况蟲吟灑

淚傷兄妹閒愁更古今重陽佳節近不忍賦登臨

偕金陵馬姓齋過訪金介生黃石農時介生臥病

石農亦苦臂痛感其窮老情見乎詞

年來聚散風中絮老友驚看雪滿顛爲感豪華傷往事
苦遭窮病迫衰年平生肝胆向人盡垂死飢寒盲世憐
且喜江南佳客在強教歡會莫淒然

大甯禪院看鶴贈命之

客有自潼關攜雙鶴來者命之畜之於大甯禪院

來從萬里潼關道雙宿雙鳴慰寂寥顧影禪房時自許
雄心滄海未能消終當勁翮搏風露暫與孤僧閱暮朝
尙識主人恩誼篤翩然莫遽向晴霄

二鶴一忽飛去命之屬再作詩

朝朝看鶴來僧院忽起蒼茫萬里情
遼海白雲傷遠別竹陰斜日照孤鳴
空階閒寂原非計隻影淒涼也自驚
徑欲登樓爲招返碧天無際暮烟橫

月夜偕姓叁礪泉貽之眉岡命之入龍眠宿別峯

菴夜雨

笑呼明月出東海導我前行山路長
峯回樹密不知寺夜靜風寒時有霜
佛燈老屋耿無燄僧茗活泉清共嘗
瀟瀟忽聽竹松響朝起看雲飛滿堂

次日雨中遊雙溪張太傅歸老別業也

清平宰相林泉福二百年來舊草堂帶雨來穿烟漠漠
感時難禁淚浪浪坐看紅葉逐風去起折黃花插鬢傍
戴笠披蓑更峯頂白雲萬壑與天長

小酌作此示姓仝

馬生漂泊走天涯風雨秋深苦憶家兩鬢漸愁生白髮
一尊聊與醉黃花浮生勝聚那常得在蹟回思多可嗟
欲起公麟問圖畫滿山楓樹宿寒鴉

與礪泉期皖江歸舟過樅陽後以陸旋書來述魯
生諸友賞雪白鶴峯之樂索詩以補其缺

歸帆竟失樅陽約勞汝江頭日具餐但得友朋卽肝膽

不知兒女正飢寒鴻泥聚散終何定風雪登臨且盡歡
我已聞之興飛動書來還索句同看

送姓參歸卽東秦遠亭孫竹康吳次山

昨夜草堂風雪深清朝送別愁雲陰長江萬里流不盡
孤客一帆時獨吟歸去爲摩伯時畫姓參許歸後爲再
作龍眠山莊圖再
來許聽黃鸝音約明歲二月重來故人白下苦憶我爲道相思

同此心

姓參畱採菊小像索題雪夜偶賦

挂帆東別射蛟臺連日思君未許回今夕山城風雪裏
青衫黃菊故人來

我欲

我欲西行殺馬關北燕東魯更南蠻卅年壯志虛空闊
萬里浮雲自往還野鶴孤飛常近日寒鴉何事不歸山
一竿徑入秋江去短楫長歌天地間

味經山館詩鈔卷五

桐城戴鈞衡箸

門人王祐蕃校

丙午九首

黃沙

黃沙忽萬里天地失陰晴花柳蒼茫合風雲慘澹驚誰
將掃空闊坐使復清明滿眼止如此狂歌涕泗橫

偕諸子夜飲西山貽之醉後取酒澆枯冢痛哭陳
詞依意賦之

江郎酌酒向孤墳痛哭悲歌不忍聞浮世百年終有盡
夜臺長臥孰如君况逢時難同仇少更值途窮萬緒紛

地下倘生能共飲定依衰草泣寒雲

題湯雨生將軍孤笠圖

將軍與金谿周保緒作雙笠圖訂交保緒死將
軍作孤笠圖以致慟

男兒翻手作雲雨交滿天下何足數要令肝膽露白日
毋使意氣消黃土將軍颯爽英姿殊談兵說劍今孫吳
同時奇才有周子聲華傾倒東南隅茯苓在地菟絲出
精氣貫通閒不得相逢一笑成白首慷慨悲歌夜深黑
鍾期忽死牙碎琴寥寥四海誰知音江風不醒泉臺夢
江月常懸後死心吁嗟乎浮生壽考稀百年古來萬事

皆雲烟交遊存歿等閑事將軍之友非偶然十年同志
傷懷抱况復憂時感衰老報

國常思濟世才淚痕溼盡孤墳草墳頭宿草今全枯周
郎才畧當時無我從風雨瀟瀟夜來展將軍孤笠圖

兩生將軍復出琴隱圖索題自言官浙江時思隱
所作四十年矣盛衰之感念之慨然

將軍忠孝之孫子

祖某官臺灣鳳山縣令
沒於賊父某殉父難

儒雅風流曠

代稀白髮談兵人事改暮年憂國壯心非回思虎帳逢
清晏便脫貂冠乞賜歸更欲出山今老大孤琴重撫淚
沾衣

漁翁

漁翁晒網長江岸坐近蘆花白滿頭一艇縱橫臥清淺
百年烟雨恣遨遊得魚沽酒此生足痛飲狂歌到死休
昨夜東風潮信長五更乘月向中流

喜厚子歸里又將有河上之行

萬里盡秋意北風生寒色聞君遠來歸忻喜不能食杭
城昨臥病欲死延一息何期今夕酒共此燈前席昔去
鬢初霜今來無一黑三載不相見萬事多反側豈獨一
身異感喟淚沾臆嗟君征轡停又欲辭鄉國詎不戀兒
女飢驅那可得越鳥生蠻方代馬宜邊域云何共鄉井

終歲動南北吾儕交有神聯合止形迹一心通寤寐萬
里生羽翼且盡杯中歡毋爲別後憶

偕厚子召青曾生貽之存之眉岡命之話城中近

事有感

天寒風急算雲屯城郭蒼茫白日昏滿眼青山思故老
百年喬木慟朱門文章歌泣知何益詩酒飄零強共論
徑約移家向樵牧深巖幽谷自成村

答馬生起升

商飈動城樹萬葉紛辭柯與爾依晨昏欲別將如何辭
歸非汝遺念我高堂痾一夕不相親所懼良已多而翁

亦衰老鬢髮初霜皤軀羸親所憂善保母焚和吾道日
陵替大海奔隕波業抗希古懷休爲俗所訛曩獻足可
師戀我意則那相違矧匪遙問字時來過悠哉後序長
去矣母蹉跎去矣用後漢書列女傳

夢先仲兄驚起

推枕不成寐起看燈影昏驚風時亂竹寒月夜當門尙
欲尋蹤影無端溢淚痕遼天孤鶴去煩汝爲招魂

戊申六首

得劉叔毅哭子詩賦答

久別聞書喜亟開數行纔讀淚盈腮如何東野亡兒後

兒鏃以二月殤又報延陵瘞子回難遣最當初化去達觀聊作
未曾來此情相訴終無極各撫愁膺止自哀

莫漫情痴苦斷腸強將濟物味蒙莊死生萬古只如夢
修短百年安有常兵火東南才議息風波江漢又流亡
本年江漢水災爲數百年所未有天心世難今如此兒女私衷尙足傷

蠶詞

桑柘陰濃匝地垂小牕風暖日長時江村採葉歸來晚
飢殺春蠶知不知

三月三日雲滿山不晴不雨開心顏

五行志三月三日天陰無日不雨蠶

大人間蠶熟知多少不到絲成不肯閒

三起三眠朝復昏千絲萬縷待線盆可憐一片纏綿意
覆遍寒兒不解恩

泊舟白鶴峯下

一峯江上立如鶴欲西翔歲歲峯前過江流如此長風
流前輩盡謂海峯晴園歌來去此身忙無限蒼茫意銜

杯對夕陽

己酉十九首

雨中小石過宿

十日苦陰雨階前半綠苔坐傷春事盡欣見故人來久
別詩情澀雄談意氣開莫孤今夜酒拌醉對銜杯

鐘甫謂近詩真似杜公作此謝之

乞向桃源早寄身近從漁父識前津陳言自掃差能立
客氣猶存漫許真萬里蒼茫雲氣象百年騰躍劍精神
浣花一水聞猶昔草閣孤吟獨此人

重遊谷林寺訪晴嵐上人

徑從谷口深深入泉落峯腰曲曲環聞磬只疑聲在水
到門才覺寺依山松濤鶴唳共成響明月白雲相與閒
十載重來僧老大蕭然華髮坐禪關

孤舟

孤舟宿烟渚楓荻盡秋聲一夜自風雨不知江月生宵

長增客思夢短數殘更自笑如陽鳥天寒尙遠征

魯港萬壽宮

刻桷雕楹物象新巍然宮殿碍星辰沿江餓殍無人恤
十萬黃金祀水神

蕪湖關晚泊

江闊天光淨城欹墉影扶漁燈臨水大海月照船孤近
岸無完室沿途有餓夫獨聞關上吏尊酒日謹呼

天門山阻風

已愁魯港連宵雨又泊天門兩日船雲氣壓山昏似墨
濤聲滾岸白如綿潮歸漁戶新營宅歲歉荒村半斷烟

父老含愁相對語餘生猶望太平年

牛屯河大風渡江至采石

一帆側入江心裏白浪如山怒壓船帆挾風聲能跋浪
船乘濤勢欲依天蒼茫四顧不知向出沒一舟時獨前
回首更無人共濟拂衣來揖李青蓮

關中馬命之三十初度

東南一萬士意氣各縱橫所向若無敵古人今再生風
塵初壯歲霄漢待長征莫遣駒光逝相看白髮盈

呈梅伯言郎中

昔居朝市原成隱今入林泉豈自豪黃鶴白雲非有意

青天明月爲誰高風塵萬馬各馳放江海一舟聊獨操
許我湘皋問蘭芷十年前已讀離騷

夢親

客久不歸去老親心奈何青燈連夜夢白髮逐年多世
事豈能料浮雲空復過祇應秋樹裏負米日吟哦

歸舟風阻作示同行諸友

西風吹雨浪生花無數歸帆滯水涯爲語鄉心休太急
飢鴻兩岸盡無家

車行赴太平風雪改舟作此寄內

寒飈蕩雪上征裘知汝深閨念遠遊爲說今宵茅店冷

却從風浪宿扁舟

風逆自銅陵復舍舟陸行

孤櫂不能進北風江上鳴曉寒收夜雪疲馬出荒城潮
落痕猶在堤長路不平昔年禾黍地重過淚縱橫

荻港復呼舟早發

旅館雞鳴漏未終譙樓猶閃一燈紅傍山亭閣疑天上
浸水星辰轉地中策馬爲艱前去路聞一路河堤衝潰不可行呼舟
快趁曉來風平居厭說江波險兩月偏教五挂篷

登太平觀城

虹橋鏡水古宣城雪後登高望遠明采石地宜供奉住

青山天爲謝公生田廬漂沒民多散城郭傾頽市亦更
一事不隨人世改夜來寒月照江清

雪中白紵山尋梅

客中無事易思家步出城東一徑斜忽見前山動詩興
不辭風雪看梅花

將入都過別光丈栗園歸後賦呈

白髮殷勤向後生到門扶病起相迎坐談感慨若爲思
欲別蒼茫無限情萬里馳驅從此始百年艱大慎前行
謬承先達交推許深恐悠悠處士聲鄉薦後石甫先生來書云吾子高捷此榜爲不虛矣伯言先生來書云科第不足以重人得其人乃爲科第重也及是光丈復以江南得人爲慶聞

言之下愧

懼交并

別方存之

昔我邁君初兩意不相降譬之四瀆流北河南有江閱
歲中漸得相對轉增懣鄒滕自小封安敢抗大邦少年
聞道早專一無紛龐我如涉大海萬頃浮孤艘賴見彼
岸立中島迴烟雙益我曩惟文謂鐘甫獲子今乃雙規譬

髮不讓扣惑鐘互撞三日面弗親夢想足音楚今當有
遠行風雪寒孤缸對飲不成酣慘愴依春缸君居日進
業我往追征驍所覬頻惠音在客猶同窗京華覓新交
誰當百斛扛歸來質所疑就子砭駮瘳

味經山館詩鈔卷六

桐城戴鈞衡箸

門人王祐蕃校

庚戌四十七首

將入都拜別兩大人

一第尋常事差堪慰白頭卻因京國遠轉動別離愁老
病春妨劇長驅淚暗流爲憐遊子意翻戒不須憂

別兩兄

昆弟昔四人仲氏乃無祿今我復遠遊家居惟伯叔老
親日衰疲年命懼風燭縱令獲期頤爲日亦已速在家
不知歡出門裏誰告此行亦親心未敢遂裹足再拜兩

兒前承歡恃交勗善解倚閭憂母爲念塵躅
人生同氣親少小相瞻依長大各分散不得常來歸或
爲利祿牽或則驅以飢予生幸兩免三十欣無違今當
有遠行兩兄意獻歛背予相顧語弟去我心悲側聞涕
暗零兄愛乃如斯誓不久羈旅數月以爲期

出小關

三日苦泥滑新晴趁出關漸消前路雪初別故鄉山鳥
語若相送溪流殊自閒勞勞車上客從此換征顏

合肥健兒行

合肥健兒腰帶刀白光閃鑠寒生濤三三五五逐隊走

逢人側目猶鴟鴞狂歌闖入酒肆去橫刀膝上呼葡萄
主人緩諾不稱意提刀亂斫聲號呶不肯使鋒權使背
愛憎人命如牛毛大醉自稱爺去也明當爲我留嘉肴
主人致言君莫駭此非渠魁乃其曹肩輿擁從數十輩
長鎗巨礮白日驕所至號令傲卽斬飛鳥不敢鳴聲高
昔年驅車我過此傳聞若輩皆潛逃縣令嚴武莫敢犯
今乃藐法同秋毫

國家設吏爲氓庶稂莠不拔安能苗時清橫惡令若此
萬有不測誰能料淮南自昔多強梗全資爾牧爲安調
登車日暮三嘆息風沙莽莽心搖搖

渡河

黃河一曲一千里東入徐州勢漸平到海更難尋故道
遷流初得向彭城

國家歲費終何極今古通才遞擅名共說文襄繼潘賈
可知依幕有陳生

過高皇廟

漢高遺廟剩荒臺山起中原四面迴豐沛有天成帝業
蕭曹無主亦凡才荒荒日影沈烟樹檻檻車聲動地雷
興廢古今同一瞬昨朝曾謁鳳陵來

過滕縣謁文公祠

野闊田無畔春寒樹不花馬牛爭道路城郭入風沙井
地心原切衰微事可嗟只餘遺廟在藤蔓影橫斜

夜半發車寄內

漏鼓纔聞了四更輿夫呼僕誤稱明燈餘破屋昏昏影
馬甃殘槽細細聲冰雪凍餘前路白星河低照客裝輕
老親共汝牀頭夢見否征人此際行

孟廟

老柏陰濃三百株宮庭清肅一塵無峯巒繞郭特高峻
車馬到門爭下趨雲影東來連海岱山形北望接龜臯
二千一百餘年後尙覺巖巖氣未殊

漫賦

南愁雨雪北風沙始信長征不似家
夢好怕聞殘夜柝
春深時憶故園花
黃河曾渡識濤險
泰岱欲登觀日華
墮地桑弧男子事
莫因行路苦咨嗟

途中所經城郭半皆坍塌

地闕全無險城頽半復隍

清時原緩計遠患亦先防
壅塞濠何有蕭條市欲荒
國家嚴令甲終仗有司良

自遣

長路晨驅風凜冽短轅夜宿店荒涼
苦思園韭消春雨

強索村醪禦曉霜粗糲百年吾分足艱難一飯古人傷
故鄉况復多饑殍回首江干淚滿裳

盧溝橋卽事

桑乾一水尙依然古說盧龍絕塞邊今日我來河上立
此身纔近

帝城前

扶桑曉日上城臺駐馬盧溝四望開風雨不生沙氣定
太行山色向人來

葉潤臣中翰過訪追悼亡友許吾田

莽莽風沙裏君馳匹馬來相逢同恨晚道舊轉生哀吾

輩此相聚斯人去不回飄零憐稚子無計慰泉臺

奉懷植之先生卽寄厚子鐘甫存之

八十猶強健乾坤一老儒萬源通造化百慮返虛無大

海波誰涉寒巖運本孤

先生近畫寒巖獨往圖

斯文天未喪後死

待吾徒

奉懷梅伯言先生

飄然一葉向江東京國論文失鉅公四海更誰清望並

千秋將與古人同近聞講席依邗水共說儒宗紹惜翁

吾鄉姚惜抱先生主講梅花書院十數年晚年自號惜翁

安得假廛精舍側從容晨

夕坐春風

贈潘偉卿

舉世尙唯諾而君慷慨言聞義赴必勇若決江河源駢
驥志萬里鴻鵠思高鶩一事不當意感激心煩冤男兒
墜地哭生死非所論生苟混人間何如臥草根我少盛
意氣三十羈塵樊觀時有所觸雙淚動傾翻一言鬱不
吐萬骨鯁喉閒知己鑒愚直否者目爲販來都邁吾子
蓋桂同一山虛言不濟時實蹈乃彌艱但恐古人鄙毋

憂俗兒訕

洞庭泛舟圖爲朱孝廉賦

積水浮空未有涯九江風浪雜雲霞得攜妻子便成隱

直與烟波爲一家坐閱百靈時出沒醉眠孤艇任橫斜
何當買酒巴陵市共倚君山翫月華

都門將歸過別溫丈依初卽送其還長樂

滾滾飛塵欲到天北來初聚又南旋爲悲白髮艱時遇
亦顧青衫黯自憐何地更爲重會日傷心偏值中興年
尚螺萬里歸程遠畱與新詩記別筵

畱別孫芝房編修

萬里風雲護

帝京九衢車馬萃羣英幾人慷慨憂

君國孤客飄零恥

聖明親老敢言歸路遠交深難遣別時情不須灑泣同
兒女直欲相思比弟兄

贈曾通甫卽送其歸里

記訪毛生甫相從入座來快談天下事驚見古人才十
載貧如昔重逢喜更哀寶山孤塚在

生甫寶山人
歿已十年矣何地

覓蒿萊

四海求同調山陽得魯君交情出肝膽詩思入風雲牢
落京華地歸依鸞鶴羣中朝方側席莫便老耕耘

別殷子徵時子徵將往邳州以疾暫止

絮舞萍飄那自由強將杯酒慰離憂卽看身世腸堪斷

更發家書淚重流

子徵時得家書報大母病危

客路風塵何日了病

軀車馬暫今畱我歸憐汝仍爲客別夢相依到武州

出都作示同行諸子

西山雨氣溼樓臺曉別都門霽色開萬里蔚藍天浩蕩
四圍新綠我歸來艱難遠道逢初暑潦倒長亭只舊醅

但使

聖朝新政美未妨吾黨臥蒿萊

又和嘯菴作

攬轡新從冀北回黃金市駿已無臺自憐鴻羽遲霄漢
暫擁牛衣臥草萊

聖主有心求稷契書生無計報涓埃歸遲更覺親恩負
此日高堂憶舉杯

是日母大人七十壽辰

過任邱懷邊袖石編修

雄關朝發軔向夕到任邱殘雨馬前歇溼雲鴉背流望
鄉艱遠道念舊想

皇州落日城西路征驂爲孰留

薄暮

野闊風來勁天高日下遲沙塵迷北顧車馬倦南馳旅
館尋栖處衰親倚望時未能邀祿養敢復滯京師

宿州道中

微雨隔殘照北風驚斷雲亂鴉爭趁樹歸馬各隨羣莽
莽平原闊勞勞客緒紛無人知舊事空問傅將軍

明傅友德

宿州

定遠阻雨訪周達夫同年

風雨瀟瀟滯曲陽踏泥穿巷一登堂儒宗眾共推堅伯
難弟今兼識季方萬里壯心同伏驥十年時事悔亡羊
相逢且盡杯中物明日思君已異鄉

早行卽事

馬上看殘月隨人一路行水光浮曉日山氣潑新晴雜
樹青如此平疇綠已盈還鄉無別念所祝是西成

車中曉臥夢得遠山青揖馬之句覺而續之
積雨收平野前村見曉曛遠山青揖馬高樹白栖霞石
徑黏泥滑河流到澗分龍岷山色好歸臥學參軍

寄楊性農庶常

楊侯性曠佚天馬不受轅意象若孤寂對客無一言下
筆乃深造直抉星宿源真氣自由曲達險逕誰鉤援寒泉
洗腥臊快雨絕塵喧一科二十載孤艇浮湘沅今者上
春官承復登詞垣平生鬱鬱懷向後抒愁怨此身旣許
國初志不可諉小試康一方大用調坤元嗟哉衛公鶴
出入虛高軒

寄邵映垣員外

南歸二千里黃塵白日高入門多所歡念舊轉云勞昨
者人海中簪蓋皆英髦揮手各萬里散若晨星寥升沈
付川流離恨不可淘子尤吾所師經義窮牛毛兩疑出
互析一語破千牢歸來臥空山魂夢猶燕郊未知京華
夜曾否時相遭

天閭言路敞諸達交封章沈痾祝起坐幽晦歡春陽私
望獨未酬俯仰何傍徨知非草野憂而乃心偏長仰睇
浮雲飛欲翳晨曦光安得吹散滅萬里來颺狂炎陽方
炳耀崖穴終難藏無憂龍戰野流血紛元黃

生性薄榮祿意復重鄉井老親况衰病遠畱余豈肯昨
來逢舊侶訝我歸車猛功名在朝市子然胡退屏此意
難語君欲言還自哽田家新釀熟隨至呼醪酌相從野
人居消茲清晝永

寄孫琴西庶常

買得江頭鯉思君一寄書此心余共往別意爾何如清
切神仙地淒涼處士廬百年同遠志窮達莫教虛

送鐘甫之祁門

萬嶺切霄漢君行欲到天艱難辭老母衰病惜中年危
逕千崖石秋心一路蟬漫嫌山縣僻相倚主人賢

生死同肝膽常將熱向人孤寒翻倚賴微細亦精神四十猶無子高曾獨此身尙崇黃老意畱慰白頭親

浮雲

白日昭寰海浮雲獨暫隨眾心期快掃爾意欲何爲地霧思通氣天風已及時會看消散盡應悔入山遲

呈姚丈石甫時以鹺務差遣

道大隨窮達名高滿夏夷所懷終未展斯世已驚奇再起參鹽鹵羣情望傅師由來憂社稷不爲一人私

聖德光天壤諸賢起中興蒼生憂待洗黃閣任誰勝莫

假魚鹽隱

姚丈詩有便乞魚鹽老此身之句

終當稷契登老臣還幾輩

早晚祝飛騰

答徐懿甫

下筆驚吾黨千鈞一葉操閒情雲在谷野性鶴鳴皋
歸里生無計來書意倍豪倘能乘興訪猶可備村醪

題許叔平攜尊讀史圖

古人萬事倏已往變滅風雲隨浩蕩苟無史冊畱人間
萬古乾坤皆草莽儒生手無尺寸權出門虛作澄清想
但觀時事一鬱憤輒與古人爲俯仰忠魂已散猶日星
奸骨未枯先糞壤興衰未可委時運成敗從人猶反掌
嗟余賦性太昂激開卷無端淚落兩每思快意向當前

那識斯人已曩少年如子亦豪邁開帙銜杯歌慨慷
要起賢豪把臂行將令來者同心賞百年如寄死卽休
一意窮追力可彊毋徒柱下侈鴻富坐以虛名鎮吾黨

寄禽芝房

孫侯雲中鶴卓立羽毛整意態不自矜風格乃獨迥甫
覩心已降告別聲欲哽南歸意長悌北望時延頸書來
歡若面一讀一呼酪款款君子懷萬里向人盡憂樂不
爲軀談笑寄悲憫近聞

聖人詔百爾發深省新詩當歌舞走筆風雨猛快哉寰
海內沈醉一朝醒賢俊期公輔無才安箕頰從知萬方

悅何憂一隅警

時粵西土賊未靖

再拜復故人披忱事臺省

雪夜寄懷葉潤臣

野風號空怒作雪呼酒強酣耳不熱坐對孤釭憶萬里

飛雁不來書斷滅昨者都門甫締交車馬往來日紛迭

君與邵

懿孫鼎辰臣

爲東道一堂招飲天下傑粵東老翁

溫訓

最豪邁華髮蕭蕭談不輟魯侯同一面十載前京國重

逢倍親切舊交更得陽湖洪

衛孫

七載離悰一朝竭武陵

揚子

彝珍

合肥徐

子陵

野鶴閒雲共清潔廣西佳士數彭

昱堯

唐

敬華

隘巷同栖不容轍滿州伊

湄

與瑞安孫

衣

介董

鏡

言交各心悅左君

宗

施席半翩翩來未與酢酬誼有缺論

才諸公盡萃羸我處其閒藐滕薛白日西馳不肯畱歡
會歸來忽慘別升沈有命各殊異聚散無端總嗚咽他
年鴻爪任東西此恨綿綿那可絕矧君於我意獨豐短
句送行腸百折南歸盛暑秋復冬年光去若江河決俯
仰乾坤無限懷往往悲調眼流血想君不獨爲交遊安
得呼來快一洩

右味經山館詩鈔六卷計二百有九首吾師戴蓉洲先生自編其初刻後十年作也先生十年所作凡四百餘篇師友商訂去其半先生尙以爲多曰此時功力淺未能深造俟他年嚴汰之可也聊依師友所選如此祐蕃近年初學詩讀古人詩之暇輒好諷誦先生作手寫成冊朝夕翫味旣思先生初集久爲世所詫賞而先生雅不欲存則是集宜刊行以公諸世又先生虛懷好學所作詩文遇能者輒求是正嘗欲多鈔副本以爲就正之資則刊以代鈔尤便今先生客都門原本攜之行篋祐蕃乃以自寫本授之梓人並取向錄諸家評論之精者

附刊於後俾讀者不惟由此可以見先生心力之深而
淺者亦可因以得學詩之法其空言贊美無裨於詩教
者概不敢錄恐見者以爲阿也諸家字號一依先生所
自稱云咸豐二年壬子三月門人王祐蕃謹跋

卷一

題陳照所畫江景 文鐘甫曰一起蒼蒼莽莽颯然而
來初讀謂寫畫景也及至我昨登樓二句乃知其爲
兵家襲法畫家襯法文家借法全詩精神關節變幻
靈通起數行愈覺分外出色矣

旅館 文曰收句用孫子語意極深借從軍者諷主帥

也

橫海 孤臣 輓詩 徐懿甫曰三詩抑塞用壯今日

之瘦詞他年之信史也

所思 馬元伯丈曰山谷 張小石曰此深似半山山

谷尤有奇氣宋人以奇兀成詩者山谷而外半山后

山皆師山谷而山谷獨登極境耳後人學黃者多類

此二君

雜詩

南來

卷二

壬寅年 文曰此後諸詩無一直筆無一率語無一泛言處處有真實歸宿舉前十年客氣假象一掃空之於此中甘苦深矣

元旦作 張曰讀少陵久至此而自然流露非有意摩寫之而能似者 徐曰第二首直率胸臆仁人之言願足下終身矢之

得毛生甫凶問 自記曰氣韻略似東坡而音調近澀

由欲變從前馳騁空滑之習而未能深穩故也存此以識詩學轉步

偶書 張曰得彭澤詩田家面目矣昔賢云世人但學蘭亭面欲換凡骨無仙丹山谷謂苟得其面便已換骨余謂陶詩亦然面目豈易得邪

送人還鎮江 植之先生曰真氣往復白道語耐人諷誦由境曲也 文曰筆筆銜遞離合迴環章法極妙得張亨父開封書 植之先生曰盛唐人七律多曲折頓挫開合動盪之致不使一平直筆此詩庶其近之

文曰杜詩變化無兩句一意者餘子不解此矣此

及前送人還鎮江作俱是大家妙境 又曰起句因得書而知張已至開封便有神二句兜轉前送別時是逆挽法三句由二句生四句又兜轉得書句法流動有遠韻五句從四句生翻垂淚三字又開下句六句愧不才又開七句七句已咏足矣復以時事作收詩境如萬水千山花明柳暗讀之不忍釋手

夢遊九華山 文曰神來之筆妙在不說破夢字

寄張勗園先生 江貽之曰收句卽杜公敢料安危體猶多老大臣與安危大臣在何必淚長流之意言外感何如之

病中讀杜詩 文曰艱難初見古人心看似淺語非深
知工部甘苦者不能道也 張曰永叔謂太白詩回
視蜀道如平川凡詩文臻深至之境未有不自艱難
來者豈獨少陵然邪

渡江宿浦口 文曰詩境離合斷續鍊字鍊句鍊格俱
佳其妙在倒點夢字

月下謁包孝肅祠 文曰涪翁樊侯廟摹杜公武侯祠
得之字句氣象之外此摹樊侯廟又妙得之神味氣
脈之中 江曰妙處只是浮世悠悠誰氣節一句無
此則通身亦只涪翁空腔不見章法之妙收語亦不

耐人尋味矣此所謂歸宿也亦感慨時事而言非泛設空語故可貴

過小關 文曰潼關四語拓開作收局不平直論亦正大是從工部得來者

雪夜書感 文曰首二句下字湊密凝重無輕佻滑易之病銅龍二句故作踈宕以舒其氣亦杜公法後四句沈痛真摯固杜公人共知也

贈劉騎尉 文曰後四語卽杜公時危未授鉞勢屈難爲功之意說得沈痛悲壯亦切事得體

送姚丈石甫之四川 植之先生曰顏延之 自記曰
予自庚子讀植之先生昭昧詹言力洗從前客氣假
象爲之一年平頓滯晦先生謂與俗人唱和覺其易
勝不復追步古人其實日求古人而見之未確悵悵
靡從脫去陳言轉若無可措手壬寅癸卯兩年作遂
秘不敢呈甲辰春始以此作進先生閱之三四過笑
曰汝於昭昧詹言有得矣乃復呈前兩年作先生甚
喜以爲非復初刻之輕浮空僞蓋自後乃敢放筆爲
詩也書數語以識予之拙

挽張亨父旅榭 文曰落日悲風篇法變換不可少

送人之甘肅依族人幕中 文曰以諷爲贈杜公每有

此種

讀褒忠錄感賦 文曰余讀褒忠錄詩數百首淺陋者
無論佳者亦大抵弔輓悲傷而已此獨從陳公死後
感喟而出意境迥別是杜公法也收勉後來諸將意
更深

卷四

乙巳年 自記曰詩中七律最難昔人有云世之文士
無人不作詩無詩不七律而終身爲之有不知其故
者誠哉是言也吾師昭昧詹言論七律精深微妙向

來論者罕窺其境年來尋味略窺古大家精神氣脈
終未縱力爲之今年授徒城中朝夕得與師見乃專
意七律似有進步刪存十七首他體間有作焉依次
編之

讌集張太守宜園 文曰以離別起以離別收中間逐
句變換開合頓挫往復情深是精心杜黃二公而得
者 江曰風雨欲來城外村接法生動搏換

天甯禪院看鶴 文曰起雄直得勢中四容與收掉轉
境界一新

二鶴一忽飛去 文曰起不測三四五六分賦二鶴一

去一畱纏綿盡致收出場生氣遠出

次日雨中遊雙溪 文曰四句由清平二字生出非泛語也有此句意味乃佳五六變換收更出場不測

與礪泉期皖江歸舟過樅陽 文曰後四委曲飛舞勁氣直達此種亦真杜公若訪介生石農及送晴叅歸里等律猶杜公之淺者也

我欲 文曰大似放翁五六殆有所指歟收不測

卷五

題湯雨生孤笠圖 文曰末路感慨忽以雄直作收意味無窮閱者或謂收未美不知詩者也

琴隱圖 文曰題便著意如此方切時切事切人詩境
往復空遠沈鬱頓宕七律此界不易到矣

喜蘇厚子歸里 文曰五層四折筆境曲局寬飛動沈
著越鳥代馬接尤不測

答馬生起升 文曰意真至則詩自佳一夕不相親十
字讀之汗下

得劉心毅哭子詩賦答第二首 文曰收四語變局出場

何等闊大

蠶詞 文曰第一首有拯溺救焚不容稍緩之意二首
所謂功夫欠不得一分也三首所謂功被天下而無

言三詩何等寄託

牛屯河大風渡江 文曰奇幻豪放是能移太白歌行
於律者

將入都過別光丈栗園 自記曰此律落韻稍穩戊申
己酉兩年作惟答劉叔毅第二章牛屯河渡江二律
意境稍別餘皆常境矣蓋自丁未專力治經終年無
一作而詩遂退古人用功所以戒作輟也

卷六

庚戌年 文曰庚戌作凡六十首妄以鄙見刪存四十
七首其中用意最深者略爲標出大抵清深真切無

一空滑浮浪語然七律較乙巳丙午二年作尙有未及者

拜別兩大人 文曰起四語固佳後四尤深情曲至非善體親心者不能言也

孟廟 文曰此詩用意從唐元宗祭夫子廟得來孔孟道德從何處咏起故元宗避寬就窄此則句句寫廟又卻句句寫孟子前六語咏足一結便點睛矣

自遣 文曰前路敘事樸實後半則正大沈痛朱子謂聖人樂天知命之心與憂天憫人之心並行不悖存莊其亦略有此意乎

訪周達夫同年 文曰五六感慨不免陳言忽以別意
作收出場不測

送鐘甫之祁門 文曰危徑千巖石秋心一路蟬卽地
卽時以寓規戒僕當奉爲座右銘此種用意他人或
忽之矣 江曰生死同肝胆十字寫得鐘甫熱腸出
著一翻字則鐘甫之孤寒可知著一亦字則鐘甫之
於大事可知此杜公字法也淺人不解此矣

浮雲 文曰杜公咏物詩多有絕大寄託此類是也

呈姚丈石甫 文曰語語精切言在一人心憂天下杜
公每多此種